



Publicaziuns dalla vischnaunca, jamna 23

Damonda da baghegiar

2020-1026.000

Datum dalla publicaziun: ils 5 da zercladur

Ils patruns: André e Claire Häfliger, Giesserstrasse 8, 5504 Othmarsingen

Il representant: IPZ inschigniers e planisaders SA, Via Lucmagn 7, 7180 Disentis/Mustér

Object: Construcziun d'ina garascha dubla, parcella 1313, Via Luzzas 12, 7180 Disentis/Mustér

Protestas:

Ils plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 5 da zercladur 2020

Uffeci da baghegiar Disentis/Mustér

Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2018-1043.001

Marcus Berther-Janka, Via Buretsch 11, 7186 Segnas: niev lidimer e nova puschinera, parcella 236, Marias 404d, 7186 Segnas.

Nr. 2018-1052.000

Bergbahnen Disentis AG, Via Acletta 2, 7180 Disentis/Mustér: slargiar la via naven da Gendusas Dadens entochen Gendusas Dado, parcella 2541, Gendusas, 7180 Disentis/Mustér.

Disentis/Mustér, ils 5 da zercladur 2020

Uffeci da baghegiar Disentis/Mustér

Annunzias da baghegiar

All'istanza da baghegiar ein sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandonts projects:

Nr. 2020-2070.000

de Castelberg Anna Marie, Via Cavardiras 26, 7180 Disentis/Mustér: construcziun d'in niev mir da betun al cunfin dil curtin, parcella 935, Via Cavardiras 26, 7180 Disentis/Mustér.

Nr. 2020-2074.000

Manser Urs, Maihofmatte 7, 6006 Luzern: sanaziun dalla fatschada, parcella 386, Via Muschnas 1, 7186 Segnas.

Nr. 2020-2075.000

Lutz Renaldo, Via Luzzas 9, 7180 Disentis/Mustér: remplazzament dalla fueina da grillar, tegia da mises, parcella 2806, Runfoppa Sut, 7180 Disentis/Mustér.



Nr. 2020-2076.000

Manetsch Placi, Via Crestas 13, 7183 Mumpé Medel: sanaziun dall'isolaziun dils balcuns e nivellar il plaz da seser, parcella 2183, Via Crestas 13, 7183 Mumpé Medel.

Nr. 2020-2077.000

Schnoz Adrian, Via Buretsch 5A, 7186 Segnas: sanaziun dil mir-casa ed adattaziun dil terren, parcella 393, Via Buretsch 5A, 7186 Segnas.

Encunter quellas decisiuns san ins protestar a scret enteifer 20 dis dapi la publicaziun alla suprastanza communal.

Disentis/Mustér, ils 5 da zercladur 2020

Uffeci da baghegiar Disentis/Mustér

Cussegl da vischnaunca

Il cussegl da vischnaunca seraduna **venderdis, ils 5 da zercladur 2020**, allas 20.15 en halla da tennis dil Center da sport e cultura.

Muort il coronavirus ei la seduta buca publica. Per tuttina dar la pusseivladad da suandar la debatta enteifer il parlament communal, vegn la seduta emessa directamein via live-streaming. Il link leutier ei d'anflar sin www.centerdasport.com.

Tractandas:

1. Protocol 26-2017/2020
2. Center Fontauna – Innovaziun, amplificaziun ed engrondiment cumplessiv: Project e credit general per l'emprema etappa (messadi nr. 44-2017/2020)
3. Cumissiun Disentiser Card: Dissoluziun (messadi nr. 45-2017/2020)
4. Ura da damondas (conform ad art. 44 dil regulativ da fatschentas)

Il president dil cussegl da vischnaunca

Administraziun communal

Muort il firau da Sontgilcrest resta l'administraziun communal serrada naven da **mesjamna, ils 10 da zercladur 2020, allas 17.00 entochen venderdis, ils 12 da zercladur 2020, allas 9.00**. Bien engraziament per Vossa capientscha.

Administraziun communal

Appel public d'annunziar fontaunas dallas vischnauncas da Disentis/Mustér e Medel/Lucmagn

H416 Via dil Lucmagn

Correctura dalla via naven Las Ruinas–Punt sur il Rein da Medel, km 3,10 – km 3,75 project d'execuziun, appel public d'annunziar fontaunas

Denter Disentis/Mustér e Medel/Lucmagn ei planisau ina correctura dalla via dil Lucmagn sil tschancun Las Ruinas–Punt sur il Rein da Medel. En il rom dall'execuziun dallas lavurs da construcziun sa ei buca vegnir exclud la periclitaziun da fontaunas ch'ei situadas en la vischinonza. Per l'ulteriura planisaziun dil project vegn il cataster dallas fontaunas dallas vischnauncas da Disentis/Mustér e Medel/Lucmagn exponius publicamein per examinar la completadad dil cataster. Il cataster dallas fontaunas survecha sco basa per la survegionza hidrogeologica dallas fontaunas ch'existan enteifer il perimeter dil project previu, duront ed entochen la fin dallas lavurs da construcziun dil project approbau.

Il plan da cataster e las gliestas dallas fontaunas registradas enteifer il perimeter dil project san vegnir consultai duront l'exposiziun publica naven **dils 8 da zercladur entochen ils 7 da fenadur 2020** tier las



administraziuns communalas dallas vischnauncas da Disentis/Mustér, Via Cons 2, 7180 Mustér e da Medel/Lucmagn, Tgasa Lucmagn, 7184 Curaglia ni sut www.tiefbauamt.gr.ch > Rumantsch > Actualitads > Exposiziun dils projects. Igl appel d'annunziar fontaunas sedrezza a tut las proprietarias ed a tut ils proprietaris sco er a tut las utilisadras ed a tut ils utilisaders da fontaunas enteifer perimeter dil project. Las proprietarias ed ils proprietaris sco er las utilisadras ed ils utilisaders da fontaunas tschaffadas vegnan supplicai d'annunziar las fontaunas che sesanflan en lur proprietad ni che vegnan duvradas dad els, da controllar las indicaziuns gia existentas e da comunicar eventualas informaziuns e cumpletaziuns. Sin damonda san ins registrar ulteriuras fontaunas en il cataster. Per las fontaunas ch'ei buca registradas en il cataster dallas fontaunas suenter il temps d'exposiziun e tier las qualas ei vegn constatau periclitaziuns d'uront ni suenter la fasa da construcziun, sa buca vegnir fatg valer dretgs d'indemnisaziun. S'enter haver cumpletau il cataster dallas fontaunas vegnan las proprietarias ed ils proprietaris da fontaunas potenzialmein periclitadas contactai dallas persunas ch'ei responsablas per il project per fixar gl'ulteriur proceder.

**Las annunzias san vegnir inoltradas mintgamai tiels responsabels dallas vischnauncas:
Vischnaunca da Disentis/Mustér:**

Menader infrastruttura, Ervin Maissen, Via Cons 2, 7180 Disentis/Mustér (infra@disentis.ch) 081 920 36 36.

Vischnaunca Medel/Lucmagn:

Administraziun communal, Tgasa Lucmagn, 7184 Curaglia

Per ulteriuras informaziuns en connex cun il cataster dallas fontaunas stat il biro geologic incumbensau, BauGrundRisk ScRL, 7000 Cuera, signur Florian Donau (tel. 081 250 63 86) a Vossa disposiziun.

Cuera, ils 18 da matg 2020

*Uffeci da construcziun bassa dil Grischun
Inschignier cantunal, Reto Knuchel*

**Serrada dalla via d'uaul
Cavardiras–Caischavedra**

Muort lavurs da reparatura (remplazzament da canasters da lenna denter Runtget e las Aclas da Cavardiras) resta la via d'uaul Cavardiras–Caischavedra da Runtget ensiviers serrada naven **dils 8 entochen ils 30 da zercladur 2020**, mintgamai d'uront l'jamna naven dallas 7.30–17.00. Per pedunzs e velocipedists ei il passadi adina pusseivels.

Per ulteriur sclariment stat il selvicultur Simon Cathomen bugen a Vossa disposiziun (tel. 081 920 36 41). Bien engraziament per Vossa capientscha.

Disentis/Mustér, ils 29 da matg 2020

Uffeci forestal/menaschi tecnic Disentis/Mustér

Clom d'urgenza 118

Preziadas vischinas, prezias vischins

S'imaginei ch'ei brischa e negin vegn! Adina puspei caschunan fiugs gronds donns, gie mettan schizun en prighel la veta da persunas – savens perquei ch'ils pumpiers vegnan buca clamai ni memia tard. Biars tratgan: zatgi ha bein alarmau, mo adina puspei ei quei buc il cass, era tier nus el Grischun.

Perquei vala: Tier ina situaziun nua ch'ils pumpiers vegnan duvrai, ei da telefonar immediat al clom d'urgenza 118. Mo aschia eis ei garantiu ch'agid professional arriva il pli spert pusseivel sil plaz.

Engraziel per Vies sustegn!

Vos Pumpiers Sursassiala



Rimnada da pupi

Venderdis, ils 12-6-2020

Preziadas convischinas, preziai convischins. Cun la midada dallas mesiras per cumbatter il coronavirus (Covid-19) ei ina rimnada da pupi puspei pusseivla.

Adatg! Ei vegn mo rimnau gasettas, illustradas, catalogs, cudischs e prospects stampai.

Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziel. Nus rimnein buca cartun. Quel sa vegnir deponius a Raveras igl entir onn ora, e quei las mesjamnas (16.00–17.30) e sondas (10.00–12.00) e buca durant la rimnada. Bien engraziament per Vies agid e sustegn!

Nossa scola populara Mustér, Ch. Berger

Onn da scola 2020/21

Uraris e transports

Preziai geniturs, cars affons. Ils uraris da scola ed igl urari dils transports pil proxim onn da scola 2020/21 anfleis Vus sin www.scoladisentis.ch.

Jeu supplicheschel tuts affons da Segnas, Buretsch e Cuoz **dalla emprema scoletta 2020/21** da s'annunziar cun ina nova foto da portret alla staziun da Mustér pigl abbonament dalla MGB (niev sistem dad abo cun il SwissPass).

Nus engraziein a Vus cordialmein per la fetg buna collaboraziun e Vies grondius sustegn durant igl onn da scola che va alla fin e ch'ei dapi il mars staus pretensius ed extraordinaris. Nus giavischein a Vus bialas vacanzas da stad. Cordials salids e sin bien seveser

Nossa scola populara Mustér

Cuors da romontsch per affons da 3–5 onns da lungatg jester

Liug dil cuors: Disentis/Mustér

Di dil cuors: mintgamai la mesjamna

Temps: 8.00–8.50

Datum: **16 da settember 2020 entochen il zercladur 2021** (cun excepziun dallas vacanzas da scola)

Menadra dil cuors ed

informaziuns: Andrea Schmed, Disentis/Mustér (079 430 03 72)

Cuosts: Contribuziun dils geniturs frs. 160.– incl. material (frs. 5.– per lecziun)

Annunzia: Entochen ils 12 da zercladur 2020 sut admin@disentis.ch ni 081 920 36 36

Quei cuors vegn sustenius dalla vischnaunca da Mustér. Il cuors vegn menaus enteifer il project «Wunderfitz e Redeblitz» (www.wunderfitzundredeblitz.ch).

*Departament da sanadad, scolaziun, cultura e sport
Geraua Jris Lombris*
